



Loschs genitours digl iniziants d'Origen ed en losch president digl cunsegl grond: Lucia e Rudi Netzer cun Martin Aebli (da san.).

«Origen è betg angal ena culissa»

Nova Fundaziun Origen: Premi Wakker 2018

DA GION NUTEGN STGIER / ANR

■ **An en rom festiv è la Protecziun dalla patria surdo a Riom alla Nova Fundaziun Origen igl Premi Wakker. Igl è l'amprema geda tgi ena organisaziun è retschet chel premi nazional e betg ena vischnanca. Igl act da festa è atratg en grond public ed è gia li sot tschiel avert.** Premis totgan tar *Giovanni Netzer* siva digl 2005 ple u manc tar igl mintga de. Igl intendant digl Origen Festival Cultural è adegna puspe nia undro per sia lavour exemplarica a favour dalla cultura e betg igl davos er pigl sies angaschamaint pigl svilup economic e per la sia tenuta etica. Cun surdar la Protecziun dalla patria alla Nova Fundaziun Origen igl Premi Wakker 2018 è Netzer survagnia ena distincziun tgi vign schiglio angal surdada a vischnancas tgi tgrain igl bagn architectonic e local digl li. Chegl fò Netzer er siva da tschintg onns, cura tgi Riom è davanto igl nov datgesa digl Origen Festival Cultural cun igls dus biets principals, la «Villa Carisch» e la «Clavadeira». Cun mantignair igls biets, cun far public la valour da chels, cun adegna puspe scurveir istorgias da chels scazis architectonics e culturals è Riom er survagnia duple veta. Ossa duess chegl er esser igl cass agls Mulegns noua tgi la Nova Fundaziun Origen s'angascha cun bler cor per betg lascher eir an mal igl hotel Liun.

Esser losch digl patrimoni cultural Egn digls gratulants è er sto *Christof Dietler*, igl president dalla Protecziun dalla patria grischuna. El è detg tgi la Tgira da monumaints duess aint igl avigneir neir rinforzada. El spera er tgi aint igl futur ins stema pi fitg las valours culturals tgi

bleras da nossas vischnancas vegian er. La Nova Fundaziun Origen, cun Giovanni Netzer, seia an chella tgossa en bung exaimpel tgi mareta bler lod. *Daniela Saxer*, ella tgi presidiescha la cumischung digl Premi Wakker, è detg tg'ins duess esser losch da noss patrimoni cultural. Gist ainten las muntognas ins vegia an veir senn en'ierta culturala cun aveir blers e bellezas bietsg cun ena gronda istorgia. Er chegl tgi pertotga l'architectura seian els savens fitg singulars e da ferm caracter. Cun dar a chels duple muntada, tgrair chels e far diever da chels survignia en li novas perspectivs. Gist chegl seia er igl cass tar Riom, graztga agl angaschamaint da Netzer, da sies collaboratours e sias collaboratouras e l'antiera populaziun. Origen seia betg angal culissa, na, Origen seia lavour, veta ed activitad, è menziuno Saxer.

Esser angraztgevels

Igl president dalla Protecziun dalla patria, igl Sursilvan *Martin Killias*, è punctuo tg'el admirescha cun tge angaschamaint e cun tge chito tgi Netzer s'angascha pigl mantignamaint digls bietsg architectonics. Els seian savens maletgs intacts d'en li e da chels maletgs seian avant mang an Surses anc blers scu er ainten otras regiuns. *Andrea Hämmerle*, el è president dalla Pro Origen ed el è cunzont angraztgea alla Protecziun dalla patria d'aveir undro la Nova Fundaziun Origen. Mintgign dastga er esser angraztgevel tgi Origen promova la cultura, segna per en grond svilup economic e porscha cultura da nivel fitg ot. Igl Festival duess er esser en anim per oters, pertge all'antschatta seia er Netzer sto pulit curaschous, ed oz ins dastga deir cun raschung.

Ins è d'esser avert per blier nov

Origen segna adegna puspe per surprsas e chegl an ples gros, è detg *Mario Cavigelli*, igl president dalla regenza grischuna. Menziuno è el cunzont tgi Netzer preschainta adegna produczions tgi seian en unicat e cunzont er tgi betg mintgign tgapescha forsa dalunga. Mintga produczion seia ena atgnadad, per star stupia, per galdeir, per cumpateir e per patartger. Ins vegia simplamaintg d'esser avert per blier nov, è accentuo Cavigelli. I seia per veir betg cultura la pi leva, persiva plagna perfecziun cuagl optimum a qualitat, è menziuno igl represchentant dalla regenza grischuna.

Attaschedadad tar igl li

Aint igl center digl pled da Netzer èn cunzont stos plets d'angraztgamaint. An spezial è el menziuno igls blers collaboratours e las bleras collaboratouras tgi prestan lavour exemplarica. Els ed ellas s'angaschan cun blier amour pigl Festival, per sies visitaders e bel seia tgi lour attaschedadad tar Riom e tar la populaziun seia fitg gronda. Gronda seia er la simpatia tgi blers preschaints e preschaintas vegian gia anvers Origen e chegl davent digls onns inizials digl Festival, è detg Netzer. Riom, Surses, Surmeir ed igl Grischun mossan plascheir anvers Origen, respect maretan alloura er tot igls ameis e donatours tgi Origen vegia ordvart noss cantun e chegl seia en bel domber. Igl Premi Wakker seia en segn da cuntinuar, el fetscha plascheir e graztga ad el survignan speranza er tots la forza duevra per salvar igl hotel Liun agls Mulegns. Alla fegn è Netzer detg: «Vegias en cor per igls Mulegns».



Cunsigliers digls cantuns Stefan Engler (san.) cuagl hotelier e promotour da cultura Felix Dietrich.

FOTOS G. N. STGIER



Dalla parteida alla surdada digl premi er cunsigliera nazionala Silvana Semadeni ed Adrian Schmid, igl magnagestion dalla Protecziun dalla patria svizra.



Tranter igls giasts er Luzi C. Schutz, igl mastral da Barvogn Filisour, cun Ludmila Seifert, ella tgi magna la Protecziun dalla patria grischuna.



Do alla surdada digl premi en oter maletg è tranter oter er igl actour d'Origen Fabrizio Pestilli cun la sia gruppa.



Ena bela culissa cun blera gliout.



Bels plets er da Martin Killias, igl president dalla Protecziun dalla patria svizra.